



## Fasnacht 2009

Sujet: **Mir gsehn nume no Oranje....**

Wüset ihr no im letschte Summer  
für die einte Freud für die andere Kummer  
s` isch s` Hilight gsi im 2008  
was hämer Freud ka und au glacht  
3 Wuche numme Fuessball und Feschtä  
vo ganz Europa sind's die 16 Beschtä  
am Schluss d` Spanier als Sieger das isch net gloge  
und zum Glück sind Schwobe no uf d` Schnurre gfloge!

Wobi au für uns Schwizer gits kei Grund für e Freudetanz  
unseri Nati spielt ohni Glück und Glanz  
scho nachem zweite Spiel händ sie's verbockt  
die ganzi Schwiz isch ziemlich gschockt  
denn zum Schluss en Sieg ohni Sinn  
und beidi Goal vom Reiseluschtige Hakan Yakin!

Doch mir wäret nit d` Dorfplatzrueche  
würde mir nit nach de positive Erläbnis sueche  
und do gi'ts numme Eins das isch bekannt  
unseri Fründe us Holland oder Niederland  
Via Rotterdam. Amsterdam bis uf Bärn  
Mensche in **Oranje** wie sehmer das gärn  
ob jung oder alt, gross oder chli  
alli sind in **Oranje** derbi!

D Campingplätz sind Holländer- Feschtige gsi  
ab und zue e Schwob still und chli  
ändlich Tourischte wo sich wüset z` benäh  
am liebschte hätte mr e Holländer wellä mit Heime näh  
doch numme Eine das wär net gange  
s' wäre mindeschtens Zäh, diräkt ab dr Stange!

Und an de Spieltag s`isch Famos  
isch ufem Bundesplatz mol öppis los  
gsehsch numme ei Farb so äs Gschänk,  
weisch welli?...Hejo **Oranje** dänk  
Achzigtusig Lüt mit Humor und Verstand  
dicht zämme gstande Hand in Hand  
händ gjublet gjoht und zämme glacht  
bi jedem Holländer Goal gits e Bierbächerschlacht!

Denn isch die **Oranje**- Wellä uf Basel gflosse  
hei wie händ mir Basler das Gnosse  
sogar dr Hammer Maa vor de UBS isch nümme Nackt  
dä het mr extra für d` Holländer in **Oranje** packt  
au s' Fancamp Prattele het chönne hoffe,  
ändlich viel Hölländer, nümme Tscheche halb bsoffe!

Denn ändlich..Samschtig dr 21 Juni s' isch sowit  
eusi Holländer gegä d` Russe, dä Knaller dä Hit,  
es Viertelfinal in Basel juhee, juhee  
und vor luter **Oranje** hesch fast kei Russe gseh  
und wenn doch so würdemer schetzä  
Eine wo dr lescht Vodka duett hinterä Schletzä  
ganz im Gegeteil zu unsre **Oranje**- Gspännli  
usgrüschtet mit Schal, Kämppli oder Fännli  
händ ganz Basel zur Feschthütte gmacht  
überall wird gsunge und glacht  
es paar vo denä düent es bitzeli spinne  
mache vo de Mittlere-Brugg es Brückespringe  
d` Polizei luegt zue und will nüt sage...  
hejo wartisch in de Wüeschti au nit uf ä Räge....

Doch leider het die Gschicht kei Happyänd  
eusi **Oranje** verliere und EM s isch z` änd  
es herscht e komische Stimmig in dr Schwiz  
zum zweite mol dusse dass frustriert es bitz  
d **Oranjer** händ a derä Niederlag ziemlich z` gnage  
us Fruscht vergisst z` Prattele ein si **Oranje** Wohnwage  
au Anderi reise in de gliche Nacht no Hei  
im Fancamp bisch bald ganz ellai!

Au mir Dorfplatzrueche händs ä chli trurig gseh,  
und drum gmeint: **Oranje** als Sujet das isch e Idee!  
Drum zeigt euse Wage es riese Zoggeli  
mir obe druff als Frau Antje und nit als Dotteli  
so chönne mr die **Oranje** Zit nomol Revue passiere lo  
und sie voller Freud an dr Fasnacht do  
willsch uns hälfe zum glücklich sie  
denn lad uns eifach uf ä Wyswy i.  
Doch sprichst du Hochdeutsch? Tues bitte net versueche,  
das wünsche sich die **Oranje** aghuchte Dorfplatzrueche!